
Gwahoddiad i Dendro ar gyfer darparu Gwasanaethau Archwilio Mewnol S4C

Cyhoeddwyd:

7^{ydd} Ionawr 2026

Dyddiad cau ar gyfer
derbyn ceisiadau am eglurhad:

21^{ain} Ionawr 2026

Dyddiad cau ar gyfer
cyflwyno ymatebion tendro:

4^{ydd} Chwefror 2026

Cyflwyniad

Mae'r ddogfen hon yn gwahodd tendrau gan unigolion, cwmnïau a sefydliadau sydd â diddordeb ac sy'n medru darparu gwasanaethau archwilio mewnol i S4C, fel y'u disgrifir yn fwy penodol yn y tudalennau canlynol.

Mae'r Gwahoddiad i Dendro ("GID") hwn wedi'i rannu i'r rhannau canlynol:

- Rhan 1 Gwybodaeth Gefndirol a Rheolaeth Fewnol
- Rhan 2 Gwybodaeth Benodol i'r Cytundeb
- Rhan 3 Gwybodaeth i'w Chynnwys yn yr Ymatebion i'r Tendr
- Rhan 4 Amlinelliad y Broses Dendro a Cheisiadau am Wybodaeth Bellach
- Rhan 5 Meini Prawf Gwerthuso a Dyfarnu'r Cytundeb
- Rhan 6 Nodiadau Cyfreithiol

- Atodiad 1 Matrics Gwerthuso
- Atodiad 2 Ffurflen Wybodaeth Sylfaenol
- Atodiad 3 Strwythur Corfforaethol S4C

Darllenwch y Gwahoddiad i Dendro hwn yn ofalus. Mae'n bosibl na fydd ymatebion i'r tendr nad ydynt yn cydymffurfio â'r gofynion a nodir yn y Gwahoddiad i Dendro hwn yn cael eu gwerthuso fel rhan o'r broses dendro hon.

Noder fod y broses dendro hon, gan gynnwys y Gwahoddiad i Dendro hwn, yn ddarostyngedig i'r nodiadau cyfreithiol a nodir yn Rhan 6.

Rhan 1 Gwybodaeth Gefndirol

1.1 S4C

Mae S4C yn gorff statudol sy'n darparu gwasanaethau teledu gwasanaeth cyhoeddus a chynnwys digidol o safon uchel yn y Gymraeg. Mae ei wasanaethau wedi'u hanelu'n bennaf at gynulleidfaoedd yng Nghymru, ond hefyd at unrhyw un sy'n dewis ymgysylltu â darlledu Cymraeg yn ehangach.

S4C yw'r unig sianel deledu Gymraeg yn y byd ac un o bum darlledwr gwasanaeth cyhoeddus y DU.

Fe'i sefydlwyd yn awdurdod darlledu annibynnol o dan Ddeddf Darlledu 1981, ac mae bellach yn gweithredu o fewn y fframwaith a nodir yn Neddf Cyfathrebiadau 2003 a Deddf Darlledu 1990 (fel y'i diwygiwyd).

Mae S4C yn atebol i Ysgrifennydd Gwladol y Deyrnas Unedig dros Ddiwylliant, y Cyfryngau a Chwaraeon.

Am ragor o wybodaeth am S4C, cyfeiriwch at yr [Adroddiad Blynyddol a'r Cyfrifon](#) diweddaraf; neu cysylltwch â Geraint Pugh, Ysgrifennydd Bwrdd S4C (drwy ysgrifennydd@s4c.cymru).

1.2 Gwybodaeth Gefndirol am y Cytundeb

Mae'r tendr hwn yn cael ei gynnal gan Bwyllgor Archwilio a Risg Bwrdd S4C ("y Pwyllgor").

Ers i'r darpariaethau perthnasol yn Neddf y Cyfryngau 2024 ddod i rym ym mis Awst 2024, mae S4C wedi gweithredu model bwrdd unedol statudol ar gyfer ei drefniadau llywodraethu. Ffurfiolodd y ddeddfwriaeth y Bwrdd Unedol cysgodol blaenorol, a oedd wedi bod yn gweithredu ar sail weinyddol ers mis Mawrth 2018 yn dilyn argymhelliad o adolygiad annibynnol o S4C. Ceir rhagor o wybodaeth am y trefniadau llywodraethu hyn ar [wefan S4C](#).

Ceir gwybodaeth am y cytundeb a gofynion S4C yn Rhan 2.

Ceir rhagor o wybodaeth am ddyletswyddau, strwythur a pherfformiad S4C yn [Adroddiad Blynyddol a Chyfrifon S4C](#), ynghyd ag ystod o ddeunyddiau corfforaethol eraill ar [wefan S4C](#).

1.3 Rheolaeth Fewnol

Mae Bwrdd S4C wedi ymrwymo i'r safonau uchaf o reolaeth gorfforaethol, ac wedi sefydlu fframwaith o reolaeth fewnol, yn unol â gofynion Côt Llywodraethiant Corfforaethol y DU. Mae Bwrdd S4C yn cynnal asesiad blynyddol o hyfywedd busnesau S4C. Mae hefyd yn paratoi datganiad sicrwydd blynyddol ar gyfer y Pwyllgor Archwilio'r ADdCCCh. Yn ogystal, rhaid i Fwrdd S4C roi mewn lle drefniadau i sicrhau bod yr archwiliad mewnol yn cydymffurfio gyda safonau'r llywodraeth a nodir yn y dogfennau "Government Internal Audit Manual" a "Public Sector Internal Audit Standards".

Mae'r prif elfennau yn cynnwys:

- i. **Amgylchedd Rheoli** – fframwaith trefniadol sydd â chyfrifoldebau wedi'u diffinio'n eglur ar gyfer rheolaeth fewnol. Nodir y prif systemau rheoli mewn amryw o bolisiau a llawlyfrau mewnol.

- ii. **Adrodd Ariannol** – ceir system gynhwysfawr er mwyn adrodd ar reolaeth gan gynnwys paratoi cyllidebau blynyddol yn ôl canolfan gost sy'n seiliedig ar swm o sero, yr adroddir arnynt wedyn yn chwarterol gan gymharu'r canlyniadau gyda'r gyllideb a chan archwilio amrywiadau sylweddol. Paratoir rhagolygon o'r ymrwymïadau gan ddiweddarau'n rheolaidd drwy gydol y flwyddyn.
- iii. **Ansawdd ac Uniondeb Personél** - bydd staff profiadol sydd â chymwysterau priodol yn cymryd cyfrifoldeb am yr holl swyddogaethau busnes allweddol. Mae'r system asesu staff yn caniatáu monitro safonau perfformiad unigol.
- iv. **Rheolaeth Weithredu** – bydd pob canolfan gost yn cynnal rheolaeth a threfn ariannol sy'n briodol i'w hamgylchedd busnes ei hun gan gydymffurfio â'r safonau a chanllawiau cyffredinol a gymeradwyir gan y Bwrdd.
- v. **Monitro** - cyflwynir yr adroddiadau ar y system reoli ariannol fewnol gan y rheolwyr a'r swyddogaeth archwilio fewnol, yn y lle cyntaf i Bwyllgor Archwilio a Risg Bwrdd S4C. Bydd yr archwilwyr yn arolygu'r drefn reoli i'r graddau sydd eu hangen ar gyfer mynegi eu barn archwilio gan adrodd am unrhyw ddiffygion sy'n codi yn ystod eu gwaith.

Rhaid i'r Pwyllgor ymfodloni ar bob mater sy'n ymwneud â phriodoldeb a threfn ariannol a thrafod gyda'r archwilwyr ynghylch unrhyw faterion sy'n achosi pryder sy'n codi o'u harchwiliad.

Rhan 2 Gwybodaeth Benodol i'r Cytundeb

2.1 Cwmpas y Cytundeb

Bydd ystod y gwaith o dan gytundeb y gwasanaeth yn cynnwys archwiliad o'r cofnodion a phrosesau cyfrifo ac eraill o flynyddoedd ariannol ar gyfer cyfnod tair blynedd cychwynnol o'r flwyddyn adrodd 2026/27, yn unol â rhaglen waith a gytunir gyda'r Pwyllgor. Mae gofynion pellach ynghylch y gwasanaeth i'w gweld yn **Rhan 3** isod.

Mae S4C yn amcangyfrif y byddai nifer y diwrnodau sydd eu hangen i gyflawni'r gwasanaeth (fel y nodir yn y GID hwn a **Rhan 3** yn arbennig) tua 25 diwrnod y flwyddyn (gan gynnwys cynllunio a gweinyddu).

Pe bai'r Tendirwr yn teimlo bod angen mwy o ddyddiau arnynt i gyflawni'r gwasanaeth bydd modd iddynt nodi'r mater yn eu cais, ac yn ystod y cyfweiliadau, os bydd yn derbyn gwahoddiad i gyfweiliad. Ni fyddai hawl gan y Tendirwr llwyddiannus i ymgymryd ag unrhyw waith uwchlaw'r nifer o ddyddiau a gytunwyd heb ganiatâd S4C ymlaen llaw, gan gynnwys cytuno ar unrhyw dâl ychwanegol a allai fod yn ddyledus. Ni ellir disgwyl yr un gyfradd â'r diwrnodau a arfarnwyd yn wreiddiol.

Mae'r rhan fwyaf o'r dogfennau sy'n ymwneud â'r gwasanaeth ar gael yn Gymraeg yn unig, felly bydd angen i'r Tendirwyr sicrhau a dangos gallu ieithyddol digonol yn eu cais.

Mae dyletswydd ar S4C i sicrhau nad oes unrhyw gymhorthdal uniongyrchol nac anuniongyrchol ar gyfer ei gweithgareddau masnachol yn dod o Gronfa'r Gwasanaeth Cyhoeddus. Mae dyletswydd hefyd i ymdrin ar wahân â'r Gronfa'r Gwasanaeth Cyhoeddus a'r Gronfa Gyffredinol. Dylai ceisiadau ddangos cynlluniau'r Tendirwr i adlewyrchu'r gofynion hyn o fewn y swyddogaeth archwilio. Mae'r Strwythur Corfforaethol a geir yn **Atodiad 3** yn adlewyrchu arwahanrwydd y ddwy gronfa ac yn dangos yr is-gwmnïau sy'n eistedd o dan y Gronfa Gyffredinol.

Disgwylir i'r Tendirwr llwyddiannus wneud asesiad risg ar y cychwyn ac i lunio cynllun archwilio tair blynedd newydd yn ystod blwyddyn gyntaf y cytundeb.

Dylai'r Tendirwr esbonio sut y bydd yn cyfathrebu gyda'r Swyddfa Archwilio Genedlaethol, fel archwilwyr allanol S4C, ac i gadarnhau y bydd yn caniatáu mynediad dilyffethair iddynt i'w papurau gweithiol.

2.2 Hyd a Thelerau'r Cytundeb

Bydd y cytundeb am gyfnod o 3 blynedd, gyda'r opsiwn i ymestyn y cyfnod am 12 mis ychwanegol.

Bydd S4C yn adolygu'r cytundeb a pherfformiad y cwmni llwyddiannus ar ôl y flwyddyn gyntaf, ac mae'n cadw'r hawl i derfynu'r cytundeb ar ddiwedd y flwyddyn gyntaf yn dilyn adolygiad o'r fath. Bydd yr adolygiad hwn yn ychwanegol at unrhyw adolygiadau rheolaidd a ddarperir yn y cytundeb.

2.3 Gwarantau Rhiant Gwmni a Chonsortia

Noder y gall S4C ofyn i'r Tendirwr llwyddiannus ddarparu gwarant gan riant gwmni. Os bydd consortiwm yn cyflwyno ymateb tendro sy'n dderbyniol i S4C, gall S4C, yn ôl ei ddisgresiwn, fynnu: (i) i'r consortiwm ffurfio endid cyfreithiol cyn ymrwymo i'r cytundeb; a/neu (ii) atebolrwydd ar y cyd ac yn unigol ar ran holl aelodau'r consortiwm; a/neu (iii) gwarantau a/neu ymrwymadau gan rai neu'r cyfan o aelodau'r consortiwm mewn perthynas â rhai neu'r cyfan o aelodau eraill y consortiwm.

Rhan 3 Gwybodaeth i'w Chynnwys yn yr Ymateb i'r Tendr

3.1 Gwybodaeth Angenrheidiol

Dylai'r Tendirwyr ddarparu'r wybodaeth ganlynol fel rhan o'r ymateb tendro er mwyn dangos yn fanwl sut y bodlonir gofynion S4C:

- **Ffurflen Wybodaeth Sylfaenol** yn y ffurf y'i gosodir yn Atodiad 2.
- **Datganiad Ysgrifenedig** yn nodi methodoleg i ddarparu'r gwasanaeth. Dylai'r Tendirwr nodi:
 - i. **Cymwysiadau perthnasol ac arbenigedd proffesiynol** - manylion y cymwysiadau perthnasol mae'r Tendirwr yn meddu arnynt, a dangos ei bod yn berchen ar yr arbenigedd proffesiynol i ddarparu'r swyddogaeth archwilio y cyfeirir ati yn y GID hwn.
 - ii. **profiad o ddarparu gwasanaethau tebyg** - manylion profiad o ddarparu gwasanaethau tebyg i gleientiaid perthnasol yn y gorffennol. Wrth ddarparu manylion cleientiaid tebyg mae'r Tendirwr wedi gweithio gyda nhw dylid cynnwys manylion ystod y gwasanaethau a ddarparwyd, y dyddiad(au) y darparwyd y gwasanaethau a gwerth y cytundeb. Dylai'r Tendirwr gadarnhau a chafodd unrhyw gontract ar gyfer darparu gwasanaethau archwilio ei derfynu am berfformiad gwael neu a hawliwyd unrhyw iawndal yn ei erbyn dan unrhyw gontract o'r fath yn y tair blynedd diwethaf.
 - iii. **Dealltwriaeth o Anghenion S4C** – barn y Tendirwr ar y materion ariannol allweddol ac eraill sy'n wynebu S4C, eu goblygiadau i'r broses archwilio, a'r manteision y gallai eu cynnig i'r gwasanaethau archwilio ar gyfer S4C. Dylai'r Tendirwr nodi'r risgiau strategol allweddol y credai sy'n berthnasol i fusnes S4C, a sut y bydd ei gynnig ar gyfer gwasanaethau archwilio mewnol yn ychwanegu gwerth at y broses o reoli a lliniaru'r risgiau hyn. Bydd disgwyl i'r Tendirwyr ddangos gwerthfawrogiad o'r rôl y mae archwilio yn chwarae i sefydliad fel S4C a'i statws arbennig fel sefydliad a ariannir yn gyhoeddus, ond sydd hefyd wedi'i awdurdodi i gynhyrchu incwm drwy weithgareddau masnachol penodol.
 - iv. **Dull yr Archwilio** - cynlluniau manwl y Tendirwyr ar gyfer ymgymryd â'r gwaith hwn gan gofio natur cyllido S4C ac ymrwymiad y Bwrdd i arddel rheolaeth gorfforaethol o'r safon uchaf.

Dylid cynnwys y canlynol:

- awgrym o asesiad anghenion archwilio, ynghyd ag esboniad o'r prosesau a ddefnyddiwyd i benderfynu ar yr asesiad anghenion;
- disgrifiad o ddull adrodd arfaethedig y Tendirwr gan gynnwys esboniad o sut fydd y Tendirwr yn sicrhau prydlondeb ac effeithiolrwydd adroddiadau a ddarperir i S4C;
- disgrifiad o'r gweithdrefnau a ddefnyddir i sicrhau ansawdd y gwaith, gan gynnwys esboniad o unrhyw dechnegau archwilio cyfrifiadurol / yn seiliedig ar ddeallusrwydd artiffisial a ddefnyddir;
- esboniad o sut fydd y Tendirwr yn gwahanu'r cronfeydd cyhoeddus a chyffredinol; ac
- cynllun dangosol ar gyfer y flwyddyn gyntaf yn gynnwys y canlynol:
 - a. y nifer o ddyddiau gwaith mae'r Tendirwr yn credu sy'n addas;

- b. disgrifiad o sut y bydd y Tendirwr yn rheoli'r broses drosglwyddo o'r archwilyr presennol (os yn briodol); a
 - c. disgrifiad o sut bydd y Tendirwr yn sicrhau partneriaeth weithiol effeithiol â'r archwilyr allanol.
- v. Gallu Ieithyddol** - Bydd llawer iawn o'r ddogfennaeth sy'n ymwneud â'r swyddogaeth archwilio ar gael yn y Gymraeg yn unig. Dylai'r Tendirwyr nodi sut y byddant yn sicrhau gallu ieithyddol digonol yn nhermau darllen dogfennau ac adroddiadau yn y Gymraeg. Fodd bynnag, bydd adroddiadau ysgrifenedig a/neu ar lafar yn y Saesneg i'r Pwyllgor gan yr archwilyr mewnol yn dderbyniol.
- vi. Staffio ac argaeledd eich prif gyswllt** – manylion y partner(iaid), rheolwr(wyr) a staff allweddol arall i'w haseinio i'r cytundeb. Dylid nodi unrhyw brofiad uniongyrchol, perthnasol ar aseiniad tebyg, yr amser y bydd yr unigolyn yn neilltuo i'r aseiniadau hyn a chynllunio olynu a chmau i sicrhau dilyniant staffio. Dylid nodi sut bydd y Tendirwyr yn sicrhau argaeledd eu prif gyswllt yn ystod cyfnod y cytundeb.
- vii. Ffioedd** – dylai Tendirwyr ddarparu ffi ar gyfer y flwyddyn gyntaf yn unol â'r cynllun dangosol a ddarparwyd (gweler uchod), gan nodi graddfeydd ffioedd dyddiol yr ystod o staff fydd yn gyfrifol am ddarparu'r gwasanaeth, neu'r gyfradd ddyddiol 'gyfunol' a fydd yn berthnasol. Dylai'r holl ffioedd a'r cyfraddau gael eu nodi heb gynnwys TAW, a rhaid iddynt fod yn berthnasol ar gyfer cyfnod llawn y cytundeb heb yr angen i ail-gytuno ffioedd newydd bob blwyddyn (gan gynnwys mewn perthynas ag unrhyw estyniadau a gytunir i'r cytundeb wedi'r tair blynedd cychwynnol). Dylid cynnwys cerdyn cyfraddau safonol ar gyfer unrhyw waith ymylol neu ychwanegol nad yw'n rhan o'r prif waith archwilio.
- viii Cytundeb** – copi o'r telerau ac amodau safonol hoffai'r Tendirwyr eu defnyddio fel sail ar gyfer eu cytundeb gyda S4C pe byddant yn ennill y cytundeb. Sylwer bod S4C yn disgwyl i'r telerau hyn ymgorffori'r cymalau a'r egwyddorion yn **Rhan 6.3 - Nodiadau Cyfreithiol** fel isafswm.

Dylid nodi mai at bwrpasau gwerthuso y mae S4C yn gofyn am y telerau ac amodau hyn yn unig. Mae S4C yn cadw'r hawl i negydu telerau'r cytundeb terfynol gyda'r Tendirwr llwyddiannus a/neu i gynnig cytundeb ar yr amod ei bod yn cytuno i newid rhai o'r telerau ac amodau safonol. Ni fydd cynnig o gytundeb gan S4C mewn unrhyw fodd yn cynnwys cytundeb dealliedig i'r telerau ac amodau safonol. Os na fydd y cytundeb yn cael ei gwblhau yn foddhaol ar ôl dyfarnu'r tendr, mae S4C yn cadw'r hawl i ddyfarnu'r tendr i Dendirwr arall neu i ail-dendro'r cytundeb. I'r diben hwn, rhaid i ymatebion tendro barhau i fod yn agored am 3 mis o'r dyddiad a roddir ar gyfer cyflwyno ymatebion tendro.

Gall y Tendirwyr gynnwys gwybodaeth ychwanegol pan fo hynny'n berthnasol i'w hymatebion tendro, ond ni ddylai ymatebion tendro gynnwys unrhyw wybodaeth amherthnasol nas gofynnwyd amdani yn benodol neu sy'n ofynnol yn ôl y GID hwn gan gynnwys, er enghraifft, llenyddiaeth at ddibenion gwerthu ac amodau masnachu safonol.

Os bydd y Tendirwr (neu, yn achos ymateb tendro a gyflwynir gan gonsortiwm, unrhyw aelod o'r consortiwm), ar unrhyw adeg, yn dod yn ymwybodol o'r ffaith bod unrhyw wybodaeth y mae (neu, yn achos ymateb tendro a gyflwynir gan gonsortiwm, unrhyw aelod o'r consortiwm) wedi ei ddarparu i S4C mewn cysylltiad â'r broses dendro hon yn anghyflawn, yn anghywir neu'n gamarweiniol mewn unrhyw ffordd neu heb fod yn gywir mwyach, rhaid hysbysu S4C o hyn ar unwaith.

3.2 Uchafswm y Geiriau

Dylai Tendirwyr geisio bod yn gryno wrth ddrafftio eu hymatebion i'r Gwahoddiad i Dendro hwn. Ni ddylai ymatebion tendro fod yn hwy na 5,000 o eiriau. Mae S4C yn cadw'r hawl i eithrio o'r broses dendro unrhyw ymateb tendro nad yw'n cydymffurfio â'r gofyniad hwn.

Nid yw'r uchafswm geiriau uchod yn cynnwys unrhyw eiriau sydd o fewn unrhyw luniau, diagramau neu graffiau a gynhwysir o fewn a/neu a atodir i'r brif ddogfen ymateb tendro.

Rhan 4 Amlinelliad y Broses Dendro a Cheisiadau am Wybodaeth Bellach

4.1 Amlinelliad y Broses Dendro

Bydd y broses dendro hon yn cynnwys y camau canlynol:

Cam 1	Dyddiad cau ar gyfer derbyn ceisiadau am eglurhad	12:00, 21 Ionawr 2026
Cam 2	Darparu ymatebion i'r ceisiadau am eglurhad	28 Ionawr 2026
Cam 3	Dyddiad cau ar gyfer derbyn ymatebion tendro	12:00, 04 Chwefror 2026
Cam 4	Hysbysu canlyniadau'r gwerthuso	20 Chwefror 2026*
Cam 5	Arwyddo'r cytundeb	25 Chwefror 2026*

Noder y gall y dyddiadau sydd wedi'u marcio â * newid.

4.2 Cyflwyno Ymatebion Tendro

Rhaid i Dendrwyr gyflwyno ymateb tendro yn Gymraeg neu yn Saesneg, yn unol â gofynion y Gwahoddiad i Dendro hwn, ar ffurf electronig erbyn y dyddiad cau ar gyfer derbyn ymatebion tendro a nodir yn Rhan 4.1 uchod.

Dylai ymatebion tendro gael eu marcio'n glir **Tender Archwilio Mewnol S4C** a'u hanfon drwy e-bost at:

E-bost: tendr@s4c.cymru

Caniateir i dendrau gael eu cyflwyno yn Gymraeg neu yn Saesneg. Ni fydd tendr a gyflwynir yn y Gymraeg yn cael ei drin yn llai ffafriol na thendr a gyflwynir yn Saesneg.

NI FYDD UNRHYW YMATEBION TENDRO A DDERBYNNIR AR ÔL Y DYDDIAD CAU AR GYFER DERBYN YMATEBION TENDRO A NODIR YN RHAN 4.1 UCHOD, NAC A DDERBYNNIR GAN S4C I UNRHYW GYFEIRIAD ARALL HEBO LAW AM YR UN A NODIR UCHOD, YN CAEL EU HYSTYRIED, A BYDD UNRHYW YMATEBION TENDRO O'R FATH YN CAEL EU HEITHRIO O'R BROSES DENDRO HON.

Nid yw S4C yn derbyn unrhyw gyfrifoldeb am ddiffygion mewn unrhyw system gyflwyno nac am unrhyw ymatebion tendro sy'n mynd ar goll, sy'n cael eu hoedi neu sy'n ddiffygiol. Cyfrifoldeb y Dendrwyr yw sicrhau bod eu hymatebion tendro (ac unrhyw atodiadau) yn cael eu paratoi mewn da bryd (gan ystyried y posibilrwydd o absenoldebau staff neu fethiannau technegol) ac yn cael eu cyflwyno cyn y dyddiad cau ar gyfer derbyn ymatebion tendro a nodir yn Rhan 4.1 uchod.

Noder mai 20Mb yw'r maint mwyaf o e-bost y gall S4C ei dderbyn, a'r fformatau ffeiliau a ganiateir yw Word, Excel, PDF a Jpeg. Mae'r fformatau hyn hefyd yn dderbyniol fel ffeiliau Zip. Dylai Dendrwyr fod yn ymwybodol y gall eu Darparwr Gwasanaeth Rhynggrwyd (ISP) osod terfynau is ar gapasiti e-bost, ac felly fe'u cynghorir i wirio unrhyw gyfyngiadau o'r fath gyda'u ISP neu adran TG ymhell cyn anfon yr e-bost a chyn y dyddiad cau.

Ni ystyrir bod tystiolaeth o anfon deunydd yn dystiolaeth ei fod wedi'i dderbyn, ac fe gynghorir Dendrwyr i geisio cadarnhad o dderbyn drwy e-bost ar wahân.

4.3 Ystyried Ymatebion Tendro a Hysbysu'r Canlyniad

Bydd S4C yn ystyried yr holl ymatebion tendro a dderbynnir gan S4C sy'n cydymffurfio â'r gofynion a nodir yn y Gwahoddiad i Dendro hwn, ac unrhyw wybodaeth a ddarperir yn ystod cyfweiliad (os yn berthnasol), yn unol â'r weithdrefn a'r meini prawf a nodir yn

Rhan 5 isod. Bydd dyfarnu'r cytundeb yn seiliedig ar asesiad S4C o'r ymateb tendro sy'n cynnig y fantais fwyaf, yn unol â'r meini prawf a nodir yn Rhan 5 isod. Bydd pob Tendrwr a gyflwynodd ymateb tendro yn cael ei hysbysu o ganlyniad gwerthusiad S4C drwy e-bost. Gweler Rhan 5.4 isod am ragor o fanylion.

4.4 Egluro Ymatebion Tendro

Gall S4C fynnu bod Dendrwyr yn darparu gwybodaeth bellach a/neu eglurhad ynghylch unrhyw faterion a gynhwysir yn eu hymatebion tendro. Fodd bynnag, y disgwyliad yw y bydd Dendrwyr yn cynnwys yn eu hymateb tendro unrhyw wybodaeth y maent yn dymuno i S4C ei hystyried.

Gall S4C wahodd y Tendrwr i fynychu cyfweiliad mewn person neu drwy Microsoft Teams er mwyn cyflwyno cyflwyniad byr ac egluro'r manylion a nodir yn y ddogfen ymateb tendro.

4.5 Ceisiadau am Wybodaeth Bellach

Rhaid gwneud pob math o gyswllt mewn perthynas â'r broses dendro hon, gan gynnwys unrhyw geisiadau am wybodaeth bellach a/neu arweiniad wrth gwblhau ymatebion tendro, drwy e-bost at S4C yn tendr@s4c.cymru.

Ni ddylai Dendrwyr mewn unrhyw fodd geisio canfasio nac ofyn am wybodaeth ynghylch y broses dendro hon gan unrhyw swyddog, cyflogai, asiant na chynghorydd arall i S4C.

Anogir Dendrwyr i nodi unrhyw wybodaeth bellach a/neu arweiniad y gallai fod ei hangen arnynt mewn cysylltiad â'r broses dendro hon cyn gynted â phosibl. Nodir y dyddiad cau ar gyfer cyflwyno ceisiadau am wybodaeth bellach a/neu arweiniad yn Rhan 4.1. Ni ystyrir unrhyw geisiadau a dderbynnir ar ôl y dyddiad cau hwn. Bydd S4C yn ceisio delio'n brydlon â'r holl geisiadau a dderbynnir cyn y dyddiad cau hwn.

Er budd tegwch a thryloywder, nodir y bydd yr holl geisiadau am wybodaeth bellach a/neu arweiniad mewn perthynas â'r broses dendro hon, ynghyd ag ymatebion S4C i geisiadau o'r fath, yn cael eu datgelu i'r holl Dendrwyr. Gwneir y datgeliadau hyn drwy e-bost i'r cyfeiriadau e-bost a ddarparwyd gan Dendrwyr wrth wneud cais am wybodaeth bellach.

Os bydd Tendrwyr o'r farn bod unrhyw gais am wybodaeth bellach a/neu arweiniad a wneir ganddynt yn sensitif yn fasnachol, rhaid iddynt nodi hynny'n glir drwy farcio'r cais fel "sensitif yn fasnachol" a darparu'r rhesymau pam y maent o'r farn ei fod yn sensitif yn fasnachol. Sylwer, fodd bynnag, mai S4C fydd yn penderfynu, yn ôl ei ddisgresiwn llwyr, a yw'n ystyried bod unrhyw gais o'r fath yn sensitif yn fasnachol. Os bydd S4C yn penderfynu bod cais yn sensitif yn fasnachol, ni fydd S4C yn datgelu'r cais nac ymateb S4C i'r cais hwnnw i Dendrwyr eraill. Os bydd S4C yn penderfynu nad yw'r cais yn sensitif yn fasnachol, bydd yn hysbysu'r Tendrwr o hyn. Os bydd y Tendrwr yn cytuno nad yw'r cais yn sensitif yn fasnachol, bydd S4C yn ymateb i'r cais ac yn cael datgelu'r cais a'i ymateb i'r holl Dendrwyr. Os na fydd y Tendrwr yn cytuno nad yw'r cais yn sensitif yn fasnachol, neu os na fydd yn hysbysu S4C a yw'n cytuno o fewn cyfnod o un diwrnod gwaith, ystyrir bod y cais wedi'i dynnu'n ôl ac ni fydd S4C yn ymateb iddo. Ni ddehonglir nac ystyrir unrhyw beth yn y paragraff hwn fel cyfyngu mewn unrhyw ffordd ar allu S4C i ddatgelu unrhyw wybodaeth i unrhyw unigolyn er mwyn cydymffurfio â'i rwymedigaethau o dan y ddeddfwriaeth rhyddid gwybodaeth, fel y nodir yn Rhan 6.6 isod.

Bernir bod unrhyw geisiadau ac unrhyw ymatebion iddynt a ddatgelir i'r holl Dendrwyr yn rhan o'r Gwahoddiad i Dendro hwn.

Rhan 5 Meini Prawf Gwerthuso a Dyfarnu'r Cytundeb

5.1 Profi Cydymffurfiaeth

Cyn dechrau ar werthuso ffurfiol ymatebion tendro, bydd S4C yn gwirio ymatebion tendro – yn benodol y Ffurflen Wybodaeth Sylfaenol a'r gofynion ieithyddol penodol – er mwyn sicrhau eu bod yn cydymffurfio'n llawn â gofynion y Gwahoddiad i Dendro hwn. Mae'n bosibl y bydd ymatebion tendro nad ydynt yn cydymffurfio yn cael eu gwrthod. Bydd ymatebion tendro sy'n cydymffurfio'n llawn yn cael eu gwerthuso gan S4C yn unol â'r darpariaethau a nodir yn y Rhan 5 hon.

5.2 Gwerthuso

Bydd y cytundeb yn cael ei ddyfarnu ar sail y tendr mwyaf manteisiol. Er mwyn asesu pa ymateb tendro sydd fwyaf manteisiol, bydd panel o gynrychiolwyr S4C yn gwerthuso ac yn sgorio pob ymateb i'r Gwahoddiad i Dendro hwn yn unol â'r meini prawf a'r pwysoliadau canlynol:

Cwestiynau Cydymffurfiaeth:

	Meini Prawf Gwerthuso	Dull Gwerthuso
Ffurflen Wybodaeth Sylfaenol:		
Adran 1	Gwybodaeth am y Tendirwr	Nid yw'n cael ei sgorio, ond mae'n rhaid i'r rhan gael ei chwblhau
Adran 2	Seiliau dros Waharddiad Gorfodol	Derbyniol – Wedi'i chwblhau gyda phob ymateb yn gadarnhaol neu'n negyddol gyda thystiolaeth o gamau adferol derbyniol Annerbyniol – Heb ei chwblhau neu unrhyw un neu fwy o'r ymatebion negyddol heb dystiolaeth o gamau adferol derbyniol.
Adran 3	Seiliau dros Waharddiad yn ôl Disgresiwn	Derbyniol – Wedi'i chwblhau gyda phob ymateb yn gadarnhaol neu'n negyddol gyda thystiolaeth o gamau adferol derbyniol Annerbyniol – Heb ei chwblhau neu unrhyw un neu fwy o'r ymatebion negyddol heb dystiolaeth o gamau adferol derbyniol.
Adran 4	Modiwlau Ychwanegol Yswiriant	Derbyniol – Wedi'i chwblhau gyda phob ymateb yn gadarnhaol Annerbyniol – Heb ei chwblhau neu unrhyw un neu fwy o'r ymatebion yn negyddol.
	Cydraddoldeb	Derbyniol – Wedi'i chwblhau gyda phob ymateb i C1 a C2 yn negyddol neu'n gadarnhaol gyda thystiolaeth o gamau adferol derbyniol Annerbyniol – Heb ei chwblhau neu ymateb i C1 a/neu C2 yn gadarnhaol

		heb dystiolaeth o gamau adferol derbyniol.
	Rheoli Amgylcheddol	Derbyniol – Wedi'i chwblhau gyda phob ymateb i C1 yn negyddol neu'n gadarnhaol gyda thystiolaeth o gamau adferol derbyniol Annerbyniol – Heb ei chwblhau neu ymateb i C1 yn gadarnhaol heb dystiolaeth o gamau adferol derbyniol.
	Iechyd a Diogelwch	Derbyniol – Hunanardystio wedi'i gwblhau a'r ymateb i C2 yn negyddol neu'n gadarnhaol gyda thystiolaeth o gamau adferol derbyniol Annerbyniol – Hunanardystio heb ei gwblhau neu ymateb i C2 yn gadarnhaol heb dystiolaeth o gamau adferol derbyniol.
	Diogelu Data	Derbyniol – Hunanardystio wedi'i gwblhau a'r ymateb i C2 yn negyddol neu'n gadarnhaol gyda thystiolaeth o gamau adferol derbyniol Annerbyniol – Hunanardystio heb ei gwblhau neu ymateb i C2 yn gadarnhaol heb dystiolaeth o gamau adferol derbyniol.
Adran 5	Datganiad	Nid yw'n cael ei sgorio, ond mae'n rhaid i'r rhan hon gael ei chwblhau.

Cwestiynau ansoddol:

Meini Prawf Dyfarnu	Gwybodaeth i'w Asesu	Cwestiynau Gwerthuso (Sut fydd S4C yn gwerthuso'r ymateb)	Pwysoliad
Datganiad Ysgrifenedig:			
Cymwysiadau perthnasol, arbenigedd proffesiynol a phrofiad o ddarparu gwasanaeth tebyg	Disgrifiad o gymwysiadau perthnasol ac arbenigedd proffesiynol y Tendirwr. Manylion o brofiad y Tendirwr o ddarparu gwasanaethau tebyg.	Ydi'r Tendirwr wedi dangos fod ganddo'r cymwysiadau perthnasol ac arbenigedd proffesiynol i allu darparu'r gwasanaeth? Ydi'r Tendirwr wedi darparu tystiolaeth o hyd at dri cytundeb blaenorol sy'n berthnasol i ofynion S4C?	10% 5%

		Ydy'r cytundebau hynny wedi eu perfformio o fewn y tair blynedd diwethaf?	
Dealltwriaeth o anghenion S4C	Disgrifiad o ddealltwriaeth y Tendrwr o'r risgiau strategol sy'n wynebu S4C.	A yw ymateb y Tendrwr yn dangos dealltwriaeth drylwyr o'r risgiau strategol allweddol i fusnes S4C?	7.5%
	Disgrifiad o awgrymiadau'r Tendrwr ar gyfer rheoli'r risgiau strategol allweddol sy'n berthnasol i S4C, gan gynnwys sut gall mesurau o'r fath gynorthwyo S4C i sicrhau bod ei gwasanaethau cyhoeddus yn cael eu darparu yn llwyddiannus yn unol â Fframwaith Mesur Perfformiad S4C	A yw ymateb y Tendrwr yn dangos sut byddai'n ychwanegu gwerth at y broses o reoli a lliniaru'r risgiau hyn a chynorthwyo S4C i sicrhau bod ei gwasanaethau cyhoeddus yn cael eu darparu yn unol â Fframwaith Mesur Perfformiad S4C?	7.5%
Dull yr archwilio	Awgrym o asesiad anghenion archwilio ynghyd ag esboniad o'r prosesau a ddefnyddwyd i benderfynu ar yr asesiad anghenion.	A yw ymateb y Tendrwr yn dangos bod ganddo brosesau effeithiol ar gyfer adnabod materion archwilio ac ymateb iddynt?	5%
	Disgrifiad o ddulliau adrodd y Tendrwr.	A yw'r Tendrwr wedi dangos bod ganddo ddull adrodd effeithiol a fydd yn sicrhau prydlongdeb ac effeithiolrwydd darpariaeth adroddiadau i S4C?	5%
	Disgrifiad o weithdrefnau'r Tendrwr ar gyfer sicrhau ansawdd.	A yw ymateb y Tendrwr yn dangos bod ganddo weithdrefnau a thechnegau effeithiol ar gyfer sicrhau ansawdd y gwaith?	5%
	Disgrifiad o sut bydd y Tendrwr yn darparu'r gwasanaeth.	Ydi'r Tendrwr wedi dangos fod ganddo brosesau effeithiol ar gyfer darparu'r gwasanaeth gan gynnwys	5%

	Cynllun dangosol ar gyfer y flwyddyn gyntaf.	sut bydd yn gwahanu'r cronfeydd cyhoeddus a chyffredinol? A yw cynllun dangosol y Tendirwr ar gyfer y flwyddyn gyntaf yn dangos bod ganddo gynlluniau priodol ac effeithiol ar gyfer darparu'r gwasanaeth a chydweithio â thrydydd partion (lle'n berthnasol) yn cynnwys yr archwiliwyr allanol?	5%
Gallu ieithyddol	Disgrifiad o sut bydd y Tendirwr yn darparu gwasanaeth iaith Gymraeg	A yw ymateb y Tendirwr yn dangos bod ganddo staff gyda sgiliau iaith Gymraeg digonol neu brosesau eraill mewn lle er mwyn darparu gwasanaeth iaith Gymraeg?	10%
Staffio ac argaeledd y prif gyswllt	Manylion staff allweddol y Tendirwr i'w haseinio i'r gwasanaethau.	Ydi ymateb y Tendirwr yn dangos bod gan y staff allweddol brofiad perthnasol o ddarparu gwasanaethau tebyg, a bod y Tendirwr yn bwriadu neilltuo amser staff o lefelau gwahanol o brofiad mewn modd priodol i'r gwasanaethau?	7.5%
		Ydi'r Tendirwr wedi esbonio bod ganddo brosesau effeithiol ar gyfer sicrhau dilyniant staffio	7.5%
Ffi	Manylion ffi'r Tendirwr ar gyfer y flwyddyn gyntaf yn unol â'r cynllun dangosol	A yw'r Tendirwr wedi darparu manylion y ffi blyneddol gan gynnwys y cyfraddau dyddiol y gofynnwyd amdanynt?	20%

Ceir yn Atodiad 2 y matrices sy'n nodi sut y caiff yr wybodaeth y gofynnir amdani yn Rhan 3.1 uchod ei gwerthuso yn unol â'r meini prawf hyn.

Yn dilyn cyflwyno'r tendrau ysgrifenedig yn unol â'r Gwahoddiad i Dendro hwn, bydd pob aelod o'r panel yn cynnal gwerthusiad cychwynnol o'r ymatebion tendro mewn perthynas â phob maen prawf (ac eithrio'r ffi) drwy gymhwyso'r matrices gwerthuso a nodir yn Atodiad 2. Bydd aelodau'r panel wedyn yn dod ynghyd i gymedroli a chyrraedd consensws, ac i gytuno ar y sgôr terfynol yn erbyn pob maen prawf. Gall S4C, ond nid

yw o dan rwymedigaeth i wneud hynny, benodi cymedrolwr annibynnol i gefnogi'r gwerthuswyr i gyrraedd sgôr consensws.

Gwerthuso'r Ffi

Bydd S4C yn gwerthuso'r ffi(au) a ddarperir gan yr holl Dendrwyr drwy ddefnyddio'r fformiwla ganlynol: y ffi isaf a gyflwynir fel rhan o'r tendr wedi'i rhannu â'r ffi a gyflwynwyd gan y Tendrwr. Gall S4C eithrio ymatebion sydd wedi darparu ffioedd anarferol o isel. Bydd y ffi gwasanaeth yn cael ei phwysoli ar 20%.

5.3 Diarddel Ymatebion Tendro / Dendrwyr

Mae S4C yn cadw'r hawl i ddiarddel ymateb tendro a/neu Dendrwr o'r broses dendro hon ar unrhyw adeg os:

- (a) nad yw ymateb tendro yn cydymffurfio mewn unrhyw ffordd â gofynion y Gwahoddiad i Dendro hwn;
- (b) mae unrhyw wybodaeth a ddarperir i S4C gan y Tendrwr perthnasol (neu, yn achos consortiwm, unrhyw un o'i aelodau) yn anghyflawn, yn anghywir neu'n gamarweiniol mewn unrhyw ffordd, neu'n peidio â bod yn gywir mwyach;
- (c) mae'r Tendrwr wedi cydgynllwynio ag unrhyw berson (ac eithrio, pan fo'r Tendrwr yn gonsortiwm, cydgynllwynio rhwng aelodau'r consortiwm mewn perthynas ag ymateb tendro'r consortiwm) mewn cysylltiad â'i ymateb tendro ef neu ymateb tendro unrhyw Dendrwr arall;;
- (ch) mae ffioedd y Tendrwr yn ymddangos yn anarferol o isel ac, wedi i'r Tendrwr gael ei ofyn i egluro'r tendr (neu'r rhannau y mae S4C yn ystyried eu bod yn anarferol o isel), nid yw'r ymateb yn rhoi esboniad boddhaol dros lefel isel y ffioedd.

Bydd unrhyw ddiarddel o ymateb tendro neu Dendrwr heb ragfarn i unrhyw hawliau neu foddion eraill sydd gan S4C.

5.4 Dyfarnu'r Cytundeb

Yn ddarostyngedig i ddarpariaethau Rhan 6.1 isod, ac yn dilyn cwblhau'r broses o werthuso ymatebion tendro, bydd S4C yn hysbysu Dendrwyr o ganlyniadau'r gwerthusiad drwy ohebiaeth e-bost.

Os bydd y Tendrwr buddugol yn gwrthod derbyn y cytundeb, cynigir y cytundeb i'r Tendrwr sydd yn y safle nesaf yn y drefn, hyd nes y caiff ei dderbyn.

Yna bydd y Tendrwr y mae ei ymateb tendro wedi bod yn llwyddiannus yn ofynnol i ymrwymo i gytundeb gyda S4C. Ni ffurfir unrhyw gontract oni bai a hyd nes y bydd S4C yn gweithredu'r cytundeb. Ni fydd unrhyw dderbyniad llafar nac ysgrifenedig o unrhyw dendr, nac unrhyw hysbysiad bod Tendrwr wedi bod yn llwyddiannus, yn ffurfio contract.

Rhan 6 Nodiadau Cyfreithiol

6.1 Dim Rhwymedigaeth i Gynnig y Cytundeb

Ni fydd unrhyw beth a gynhwysir yn y Gwahoddiad i Dendro hwn, nac unrhyw gyfathrebiad rhwng S4C a Dendwr mewn perthynas â'r broses dendro neu'r ymateb tendro, yn gyfystyr â chontract ar gyfer darparu unrhyw wasanaeth a gwmpesir gan y broses dendro hon, nac yn warant neu'n gynrychiolaeth y bydd unrhyw gontract yn cael ei ddyfarnu neu y gellir ei ddyfarnu.

Mae S4C yn cadw'r hawl i dynnu'n ôl o'r broses dendro hon a/neu ei gadael a/neu ei gohirio ar unrhyw adeg, i beidio â dyfarnu unrhyw gontract o ganlyniad i'r broses dendro hon, i ategu, diwygio a/neu egluro telerau ac amodau'r Gwahoddiad i Dendro hwn, a/neu i fynnu bod Dendrwyr yn egluro eu hymatebion tendro a/neu'n darparu gwybodaeth ychwanegol mewn cysylltiad â hynny.

6.2 Gwrthdaro Buddiannau

Mae'n ofynnol i Dendrwyr ddarparu manylion os rhagwelir y gallai gwrthdaro buddiannau godi rhwng unigolion sy'n ymwneud â'r cais a staff S4C. Gwneir hyn er mwyn galluogi S4C i sicrhau ei fod yn neilltuo staff i'r broses dendro nad oes ganddynt berthynas bersonol ag unrhyw Dendwr neu aelod o gonsortium staff perthnasol.

6.3 Cymalau Gofynnol

Noder bod S4C yn disgwyl i'r telerau ymgorffori'r egwyddorion canlynol, fel isafswm:

- i. Gofynion yswiriant:** bydd gan y Tendirwr llwyddiannus yswiriant atebolrwydd cyhoeddus o leiaf £10 miliwn, yswiriant atebolrwydd cyflogwr o leiaf £10 miliwn, yswiriant indemniad proffesiynol o leiaf £5 miliwn, ac unrhyw yswiriant perthnasol arall yn unol ag arfer da'r diwydiant;
- ii. Eiddo deallusol:** rhoddir i S4C drwydded ddi-dâl, barhaol ac ddi-gyfngiad o hawlfraint a hawliau eraill mewn unrhyw adroddiadau neu ddogfennau a grëir wrth ddarparu'r gwasanaethau, er mwyn galluogi S4C i ddefnyddio'r adroddiadau neu'r dogfennau hynny fel y bo'n briodol yn ôl ei ddisgresiwn llwyr am gyfnod llawn yr hawlfraint;
- iii. Gwrthdaro buddiannau:** disgwylir i'r Tendirwr llwyddiannus weithredu er budd gorau S4C bob amser, ac i beidio â gwneud unrhyw beth a allai wrthdaro â budd gorau S4C, niweidio ewyllys da neu enw da S4C, a/neu rwymedigaethau'r cwmni o dan y cytundeb;
- iv. Gwarant cydymffurfiaeth:** disgwylir i'r Tendirwr warantu y bydd yn darparu'r gwasanaethau yn unol â'r holl gyfreithiau perthnasol;
- v. Cyfrinachedd:** bydd y Tendirwr llwyddiannus yn defnyddio gwybodaeth gyfrinachol S4C at ddibenion cyflawni ei rwymedigaethau o dan y cytundeb yn unig, ac ni fydd yn datgelu unrhyw wybodaeth gyfrinachol i unrhyw berson ac eithrio i'w staff neu er mwyn cydymffurfio ag unrhyw rwymedigaethau cyfreithiol;
- vi. Deddf Rhyddid Gwybodaeth:** disgwylir i'r Tendirwr llwyddiannus ddarparu pob cymorth rhesymol i S4C er mwyn galluogi S4C i ymdrin ag unrhyw geisiadau a wneir yn unol â Deddf Rhyddid Gwybodaeth 2000;
- vii. Cyfyngiadau atebolrwydd:** disgwylir na fydd unrhyw derfynau ar atebolrwydd y Tendirwr llwyddiannus yn llai na'i lefelau yswiriant;
- viii. Hawliau terfynu:** disgwylir y gall S4C derfynu'r cytundeb drwy roi rhybudd o 1 mis. Gall S4C hefyd derfynu'r cytundeb ar unwaith pan fo'r Tendirwr llwyddiannus mewn tor-cytundeb sylweddol o unrhyw un o'i rwymedigaethau, pan nad yw unrhyw un o'r personél allweddol ar gael i ddarparu'r gwasanaethau, pan fo'r Tendirwr yn cael ei ddirwyn i ben, pan

benodir derbynnydd dros unrhyw asedau'r Tendirwr, pan fo'r Tendirwr yn methu talu ei ddyledion, pan fo'r Tendirwr yn rhoi'r gorau i gynnal ei fusnes, neu pan fo unrhyw newid rheolaeth ar y Tendirwr;

ix. Canlyniadau terfynu: yn dilyn terfynu'r cytundeb, disgwylir na fydd unrhyw rwymedigaeth ar S4C i wneud unrhyw daliadau i'r Tendirwr heblaw am waith a gwblhawyd mewn gwirionedd; bydd y Tendirwr yn dychwelyd i S4C yr holl eiddo sy'n perthyn i S4C; bydd y Tendirwr yn darparu pob cymorth rhesymol i S4C er mwyn galluogi S4C i gwblhau'r gwaith o ddarparu'r gwasanaethau; a bydd y prif delerau a nodir uchod yn parhau mewn grym.

Noder bod S4C yn gofyn am y telerau ac amodau hyn at ddibenion gwerthuso yn unig. Mae S4C yn cadw'r hawl i negodi telerau'r cytundeb terfynol a/neu i gynnig y cytundeb ar yr amod bod y Tendirwr yn cytuno i newid rhai o'r telerau ac amodau safonol. Os na chaiff contract ei gwblhau'n llwyddiannus yn dilyn dyfarnu'r tendr, mae S4C yn cadw'r hawl i ddyfarnu'r tendr i ymgeisydd arall neu i ail-dendro'r gwasanaethau, yn ôl ei ddisgresiwn llwyr.

6.4 Codau Ymarfer a Chanllawiau

Bydd yn ofynnol i'r Tendirwr llwyddiannus gydymffurfio â'r codau ymarfer, y deddfwriaeth a'r canllawiau canlynol (ymhlith eraill):

- Deddfwriaeth Iechyd a Diogelwch
- GDPR a Deddf Diogelu Data 2018
- Datganiad Ymrwymiad S4C i Amrywiaeth

Dylai pob Tendirwr gynnwys cost cydymffurfio â'r uchod (gan gynnwys cost cyngor priodol) yn y cais. Mae llawer o'r canllawiau hyn ar gael ar Wefan Gynhyrchu S4C, sydd ar gael yn <https://www.s4c.cymru/cy/cynhyrchu/page/canllawiau>.

6.5 Rhyddid Gwybodaeth

Mae S4C yn ddarostyngedig i ddarpariaethau Deddf Rhyddid Gwybodaeth 2000. Os yw unrhyw Dendirwr o'r farn bod unrhyw wybodaeth a ddarparwyd ganddo i S4C yn unol â'r gwahoddiad hwn yn sensitif yn fasnachol neu'n gyfrinachol ei natur, dylid tynnu sylw at hyn yn benodol a nodi'r rhesymau dros y sensitifrwydd yn llawn yn yr ymateb tendro. Noder, fodd bynnag, nad yw nodi gwybodaeth fel un gyfrinachol neu sensitif yn fasnachol yn gwarantu y bydd yn cael ei heithrio rhag datgelu. Mae S4C yn cadw'r disgresiwn i benderfynu a yw gwybodaeth benodol wedi'i heithrio rhag datgelu ai peidio.

6.6 Diogelu Data

Drwy gyflwyno ymateb, rydych yn cadarnhau eich bod wedi hysbysu'r holl unigolion a nodir yn yr ymateb tendro y byddwch yn rhannu eu data personol yn y modd hwn. Rydych yn cydnabod y bydd S4C yn prosesu'r holl wybodaeth bersonol a ddarperir fel rhan o'ch ymateb yn unol â Rheoliad Cyffredinol ar Ddiogelu Data 2016 a Deddf Diogelu Data 2018. Mae Hysbysiad Preifatrwydd S4C ar gael yn www.s4c.cymru, a byddwch yn hysbysu pob unigolyn y darperir ei fanylion personol i S4C o gynnwys cymal 6.6 hwn. Bydd S4C yn prosesu unrhyw ddata personol a ddarperir yn eich ymateb tendro ar y sail ei bod er eich budd chi ac er budd S4C i brosesu'r holl ddata a ddarperir gennych fel rhan o'r ymateb tendro at ddibenion gwerthuso'r ymateb tendro.

6.7 Cyfrinachedd a Chyhoeddusrwydd

Drwy gyflwyno ymateb i'r tendr hwn, mae Dendirwyr yn cytuno i gadw'n gyfrinachol unrhyw wybodaeth a ddatgelir neu a wneir ar gael iddynt gan S4C, mewn unrhyw gyfrwng o gwbl, yn ystod neu mewn cysylltiad â'r broses dendro hon. Ni ddylai Dendirwyr ddefnyddio gwybodaeth o'r fath at unrhyw ddiben heblaw paratoi'r ymateb tendro, ac ni ddylent ddatgelu gwybodaeth o'r fath i unrhyw berson arall ac eithrio, yn gyfrinachol ac

ar sail angen gwybod, i'r rhai sy'n ymwneud yn uniongyrchol â pharatoi'r ymateb tendro. Ni fydd y rhwymedigaethau cyfrinachedd hyn yn gymwys i ddogfennau sydd eisoes yn y parth cyhoeddus ar yr adeg y cânt eu datgelu neu eu gwneud ar gael gan S4C.

Drwy gyflwyno ymateb i'r tendr hwn, mae Dendrwyr yn cytuno i beidio â chyhoeddi, ac i sicrhau nad yw eu cyflogaeth yn cyhoeddi, unrhyw gyhoeddusrwydd o unrhyw fath (gan gynnwys, ond heb fod yn gyfyngedig i, hysbysiadau drwy safleoedd rhwydweithio cymdeithasol megis Facebook neu Twitter neu fel arall) ynghylch pwnc y tendr hwn neu unrhyw benderfyniad gan S4C mewn perthynas ag unrhyw elfen o'r tendr hwn, oni bai bod S4C wedi rhoi caniatâd ysgrifenedig ymlaen llaw ar gyfer cyfathrebiad o'r fath.

6.8 Ymwadiad

Nid yw S4C yn rhoi unrhyw warant na chynrychiolaeth ynghylch cyflawnrwydd neu gywirdeb unrhyw wybodaeth a gynhwysir yn y Gwahoddiad i Dendro hwn, ac mae unrhyw ddibyniaeth a roddir ar wybodaeth o'r fath ar eich menter eich hun.

6.9 Costau Tendro

Bydd pob Tendrwr yn gyfrifol am ei gostau a'i dreuliau ei hun a dynnir mewn cysylltiad â'r broses dendro hon. Ni fydd S4C, o dan unrhyw amgylchiadau, yn cyfrannu at unrhyw gostau na threuliau o'r fath.

6.10 Diwygiadau i Ddogfennau'r Tendr

Mae S4C yn cadw'r hawl i wneud newidiadau i ddogfennau'r tendr cyn y dyddiad cau a nodir yn Rhan 4.1 uchod. Er mwyn caniatáu amser i unrhyw ddiwygiad o'r fath gael ei ystyried, gall S4C, yn ôl ei ddisgresiwn, ymestyn y dyddiadau a nodir yn Rhan 4.1 uchod.

6.11 Hawlfraint

Mae S4C yn berchen ar hawlfraint y Gwahoddiad i Dendro hwn ac unrhyw ddeunyddiau eraill a gyhoeddir neu a wneir ar gael gan S4C. Ni chaniateir i Dendrwyr gopïo, atgynhyrchu, defnyddio na chyhoeddi copïau o'r Gwahoddiad i Dendro hwn nac o ddeunyddiau o'r fath (neu unrhyw ran ohonynt), heblaw ac i'r graddau y bo'n gwbl angenrheidiol ar gyfer paratoi a chyflwyno eu hymatebion tendro.

6.12 Dim Cydgynllwynio

Drwy gyflwyno ymateb i'r Gwahoddiad i Dendro hwn, mae pob Tendrwr yn ardystio:

1. bod yr ymateb tendro yn ddilys ac wedi'i fwriadu i fod yn gystadleuol;
2. nad yw'r Tendrwr wedi gosod na haddasu'r ymateb drwy, o dan neu yn unol ag unrhyw gytundeb neu drefniant ag unrhyw berson arall (ac eithrio, yn achos consortiwm, aelodau eraill y consortiwm), nac wedi mynnu bod unrhyw Dendrwr arall yn gwneud hynny; ac
3. nad yw'r Tendrwr wedi cyfathrebu ag unrhyw berson heblaw S4C swm neu gyllideb fras neu bris yr ymateb tendro, ac eithrio pan oedd datgelu o'r fath, yn gyfrinachol, yn angenrheidiol er mwyn cael premiwm yswiriant neu ddyfynbrisiau eraill sy'n ofynnol ar gyfer paratoi'r tendr.

6.13 Ymddygiad Anaddas

Os bydd Dendrwr neu gynghorydd penodedig i Dendrwr yn gwneud unrhyw ymgais i ddylanwadu'n amhriodol ar y broses dendro hon neu ar ddyfarnu'r cytundeb mewn unrhyw ffordd, gall S4C ddiarddel ymateb tendro'r Tendrwr hwnnw, yn ôl disgresiwn llwyr S4C. Gall unrhyw ymgais uniongyrchol neu anuniongyrchol gan Dendrwr neu gynghorydd penodedig i Dendrwr i ganfasio mewn cysylltiad â'r caffael hwn neu i gael gwybodaeth

gan unrhyw un o weithwyr neu asiantau S4C ynghylch sefydliad tendro arall arwain at ddiarddel, yn ôl disgresiwn llwyr S4C.

6.14 Y Gyfraith Lywodraethol

Bydd y Gwahoddiad i Dendro hwn yn cael ei lywodraethu gan gyfreithiau Cymru a Lloegr (fel y maent yn gymwys yng Nghymru), ac mae pob Tendirwr, drwy ddychwelyd ymateb tendro, yn cytuno i gyflwyno i awdurdodaeth unigryw llysoedd Cymru a Lloegr (yn eistedd yng Nghymru).

ATODIAD 1

MATRICES GWERTHUSO

Sgôr	Categori	Proffil
0	Ymateb sero / Gwan iawn	Methwyd â mynd i'r afael â gofynion S4C neu does dim tystiolaeth wedi ei ddarparu i fynd i'r afael â gofynion S4C.
1	Gwan	Cynnig gwan o ran mynd i'r afael â gofynion S4C neu gyda thystiolaeth gwan i gefnogi y byddai'r cynnig yn cael ei gyflawni, sydd â bylchau mawr, nad yw'n argyhoeddi mewn sawl ffordd neu sydd â diffyg credadwyedd difrifol.
2	Llai na Boddhaol	Cynnig sy'n llai na boddhaol o ran mynd i'r afael â gofynion S4C neu sydd â thystiolaeth gefnogol lai na boddhaol, sydd â bylchau cymedrol neu sy'n amherthnasol neu'n methu ag argyhoeddi.
3	Boddhaol	Cynnig boddhaol o ran mynd i'r afael â gofynion S4C neu sydd â thystiolaeth foddhaol y byddai'r cynnig yn cael ei gyflawni ond sydd â mân fylchau neu sy'n methu ag argyhoeddi i raddau neu sydd â diffyg credadwyedd.
4	Da	Cynnig da i fynd i'r afael â gofynion S4C sydd â thystiolaeth dda i gefnogi y byddai'r cynigion yn cael eu cyflawni sy'n ddigonol (mewn termau ansoddol), yn argyhoeddi ac yn gredadwy.
5	Arbennig	Cynnig arbennig sy'n mynd i'r afael â ac yna'n rhagori ar ofynion S4C mewn ffordd y mae S4C yn ystyried sy'n cynnig ymarferoldeb, gwasanaethau neu safonau (fel sy'n berthnasol) ychwanegol sy'n gost-effeithiol ac y gellir eu cyflawni ac sydd â thystiolaeth arbennig i gefnogi y byddai'r cynigion yn cael eu cyflawni, sy'n gyson, cynhwysfawr a chymhellol.


ATODIAD 2

FFURFLEN WYBODAETH SYLFAENOL

(Gweler y ddogfen ynghlwm)

ATODIAD 3

STRWYTHUR CORFFORAETHOL S4C



Allwedd:

Y Gronfa Gwasanaeth Cyhoeddus

Y Gronfa Gyffredinol